

МЕСЯЦА ДЕКЕМВРИЯ В 12-Й ДЕНЬ

ПРЕПОДОБНАГО ГЕРМАНА АЛЯСКИНСКАГО, РАВНОАПОСТОЛА АЛЕУТСКАГО

НА ВЕЛИЦЕЙ ВЕЧЕРНИ

Блажен муж: **На** Господи, воззвах: ставим стихов 8 и поем стихиры, глас 2.

Подобен: Киими венцы:

Киими венцы увенчаем Германа преподобного, * алеутов наставника и апостола Православия? * Той бо, родину оставль, * к дивным людям поиде * Христа проповедати и благочестие Православное, * не убоясь, ниже устрашився, врага темного, но помощию благодати Божественныя просвети народ * и приведе я ко Христу, * Иже имей велию милость. [Дважды.]

Киими венцы увенчаем Германа преподобного, * алеутов наставника и апостола Православия? * Той бо, Валаамский квас Духа восприим * и проповедуя Евангелие словом и делом алеутом, * вся плотская с плотию презре * и слезными молитвами, и на твердом леганьи, * и мраза терпеньми, и в посте пребываньи, * наипаче же любовию безмерною к людям приведе я ко Христу, * Иже имей велию милость.

Киими венцы увенчаем Германа преподобного, * алеутов наставника и апостола Православия? * Той бо с подвигом пустынным преподобия * соверши дело апостола Православия * и, много потрудився и людей спас от прелести лукаваго, * благодать получи чудотворения: * огонь угаси, воды нашествия воспяти * и, конец свой пророчески преудеде, * поиде ко Христу, Иже имей велию милость.

Ины стихиры, глас 4,

Подобен: Дал еси знамение:

Дал еси знамение алеутом, Господи, * рукою преподобного Германа, * яко да крепко уверуют в Тя, * Сына Божия и Бога, * и, спасшися от тьмы бесовския, * вниди в Свет Твой Невечерний. * Темже Твое человеколюбное смотрение славим, * Иисусе Всесильне, Спасе душ наших. [Дважды.]

Дошед до океана, преподобный Герман, Господи, * начат не рыбу неводом ловити, * но, якоже апостоли Твои, души человеческия. * И крепка бысть ловитва его помощию благодати Твоея, * и, извлек людей на твердый брег Православия, * прославися пред Тобою. * Темже Твое человеколюбное смотрение славим, * Иисусе Всесильне, Спасе душ наших.

Подвиг приял еси благоутробно, Господи, * преподобного Германа, * и, благодатию пособствовав ему, * совершил еси его в меру возраста апостолов Твоих, * и приял еси во обители Царства Небеснаго, * дерзновение дав ему молиться за люди. * Темже Твое человеколюбное смотрение славим, * Иисусе Всесильне, Спасе душ наших.

Слава, глас 5:

Пославый Господь апостолы Своя * проповедати Евангелие всей твари, * Той и ты посла в последняя времена * пронести Православие алеутом. * И бысть сеитва * сеющаго с благодатию, * и убозися нива плодоношением, * яже пребывает даже до ныне, богатеючи в Господе. * Темже ты молим, преподобне отче наш Германи, * не престай и в предняя молитвами твоими назирати людей твоих и всех нас, * празднующих любовию всечестную память твою.

И ныне, Богородичен, глас 5:

В Чермнем мори * Неискусобрачныя Невесты образ написася иногда: * тамо Моисей, разделитель воды: * zde же Гавриил, служитель чудесе. * Тогда глубину шествова немокренно Израиль: * ныне же Христа роди безсеменно Дева. * Море по прошествии Израилеве пребысть непроходно: * Непорочная по Рождестве Эммануилеве * пребысть Нетленна. * Сый, и прежде Сый, * явлейся яко Человек, * Боже помилуй нас.

Вход. Свете тихий:

Прокимен дне и чтения три преподобническая.

Премудрости Соломоновы чтение (глава 3):

Праведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их, и еже от нас шествие, сокрушение; они же суть в мире. Ибо пред лицом человеческим, аще и муку примут, упование их бессмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их, и яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющиеся Нань разумеют истину и вернии в любви пребудут Ему. Яко благодать и милость в преподобных Его и посещение во избранных Его.

Премудрости Соломоновы чтение (главы 5, 6):

Праведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни; зане десницею покрывает я и мышцею защитит их. Приимет всеоружие рвение свое и вооружит тварь в месть врагом. Облечется в броня правды и возложит шлем – суд нелицемерен. Приимет щит непобедимый – преподобие, поострит же напрасный гнев во оружие, споборет же с ним мир на безумныя. Пойдут праволучныя стрелы молниины, и, яко от благокругла лука облаков, на намерение полетят. И от каменометныя ярости исполнь, падут грады, вознегодует на них вода морская, реки же потопят я нагло. Сопротив станет им дух силы, и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навькните, судии, концов земли. Внушите держащии множества и гордящиися о народех язык, яко дана есть от Господа держава вам и сила от Вышняго.

Премудрости Соломоновы чтение (глава 4):

Праведник, аще постигнет скончатися, в покои будет. Старость бо честна не многолетна, ниже в числе лет исчитается. Седина же есть мудрость человеком и возраст старости – житие нескверное. Благоугоден Богу быв, возлюблен бысть и живой посреде грешников преставлен бысть. Восхищен бысть, да не злоба изменит разума его, или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господу душа его, сего ради потщася от среды лукавствия. Людие же, видевшие и не разумевшие, ниже положивше в помышлении таковое, яко благодать и милость в преподобных Его и посещение во избранных Его.

На литии стихиры самогласны, глас 1:

Слышав Павла, глаголюща, * преподобне отче наш Германе, * яко плоть похотствует на духа, * потщался еси худшее покорити лучшему * и плоть поработити духу. * Темже вериг железных ношением * и тяжких бремен тасканием томил еси томящую плоть, * дондеже достигл еси Христа, * паче же Христом достиген был еси. * И уллучил еси обещанную оставльшим вся Христа ради сторичную мзду благодати на земли * и живот вечный наследовал еси.

Слава, глас 5:

Кроткий душею, преподобне Германе, * вместо земли кротких по достоянию наследовал еси людей алеутских, * гонимый человеки и бесы, * скорее в Царство Божие вшел еси; * нищ сый душею и телом, * богатство Небесное получил еси, * алчбу и жажду души твоя правдою Божиею насытил еси, * чистым же сердцем твоим Бога незримое зрел еси, * плач твой молитвенный Духом Святым утешал еси. * Радуйся, преподобне, и веселися, * яко мзду твою многую ныне приемлещи, * и о нас молися спастися нам.

И ныне, Богородичен, глас 2:

Храм и дверь еси, * палата и престол Царев, * Дево Всечестная, * Еюже Избавитель мой Христос Господь * во тьме спящим явися, Солнце Сый Правды, * просветити хотя, яже созда по образу Своему рукою Своею. * Темже, Всепетая, яко матерне дерзновение к Нему стяжавшая, * непрестанно моли спастися душам нашим.

На стиховне стихиры, глас 2.

Подобен: Егда от Древа:

Егда ты мати твоя зачат во утробе, * тогда еще ты Бог, яко же другаго Иеремию, * знамена благочестием, * и, в детстве Бога усердно любя, * в храмах Его выну приметался еси, * и, внемля гласу Евангелия Христова, * мир оставил еси, * и под сению Сергия преподобнаго иноческий подвиг на ся восприял еси. * Таже, смертно поболевша за ревность твою по Бозе * Божия Мати ты чудесно исцели.

Стих: Честна пред Господем * смерть преподобных Его.

Егда из ревности вящшия в священный Валаам пришел еси, * тогда и вящший подвиг на ся подъял еси послушания и смирения, * молитве же прилежа и посту преизлиха, * высоту достигл еси зрелыя добродетели. * Темже на безмолвие в пустыни Валаамстей старцы ты благословиша, * идеже с бесы победне братися, * с Господом и со Ангелы беседовати * и со всеми святыми утешатися.

Стих: Блажен муж, бояйся Господа, * в заповедех Его восхоцет зело.

Егда Бог восхоте алеутов просветити светом Православнаго благочестия, * тогда вложи в сердце Ангелу Церкви Российския * послати ты тамо апостола и просветителя, * идеже ты, многая лета послужив * и дело изрядное совершив, * достигл еси победныя венцы от Бога в Церкви его Православней, * яже ты в предстателя людей нарицает * и в молитву к Богу ты призывает.

Слава, глас тойже:

Во юности Бога всем сердцем возлюбив * и к Нему душу твою привязав, * яко связна, Той ты поведе по словеси Своему, * аможе и не хотел еси. * Но снабде ты силою благодати Своея, * во еже из уст твоих, якоже река многоводная, * изливатися премудрости Евангелия во уши людей неверных * и чудеса дивная совершатися

рукою твоею, * якоже бо апостолом первым обещаю, * сице и на тя в последняя времена исполни. * Темже ученицы твои тя прославиша крепким благочестием своим яко учителя своего, * и Бог тя упокои по трудех со святыми, * и Церковь тя призывает в молитву к Богу о мире всего мира, * о благостоянии Православия и спасении душ наших.

И ныне, Богородичен, глас 2:

О чудесе новаго всех древних чудес! * Кто бо позна мать без мужа рождшую, * и на руку носящую, * всю тварь Содержащаго? * Божие есть изволение Рождшееся. * Егоже яко Младенца, Пречистая, * Твоима рукама носившая, * и Матернее дерзновение к Нему имущая, * не престай молящи о чтущих Тя, * ущедрити и спасти души наша.

Тропарь преподобнаго, глас 1:

Лозу Православия принесл еси в Америку из России благочестивыя * и, удобрив корень постническими трудами * и напоив обильне молитвенными слезами, * плоды принесл еси – виноград возлюбленный, * Германе преблаженне отче наш. * Темже и Бог тя прослави, яко апостола преподобнаго, * нетлением мощей и благодатию чудес, * от них же почерпающе благодеяния, восхваляем тя: * слава Давшему ти крепость, * слава Венчавшему тя, * слава Даровавшему тя Америке светило Православия.

Ин тропарь, глас 3:

Преподобне отче наш Германе, * первый светильниче, в земли нашей просиявый, * приносим вси тебе похвалы сия, * ты же, яко имеяй дерзновение ко Господу, * буди заступник нам, и утешитель, * и Церкви наша покровитель дивный, * да вси со умилением зовем ти: * радуйся, отче наш Германе, Аляски и всея Америки преславный чудотворче.

Слава, и ныне, Богородичен.

На благословении хлебов тропарь преподобнаго, дважды, и Богородице
Дево: единожды.

НА УТРЕНИ

На Бог Господь: тропарь преподобнаго, глас 3:

Преподобне отче наш Германе, * первый светильниче, в земли нашей просиявый, * приносим вси тебе похвалы сия, * ты же, яко имеяй дерзновение ко Господу, * буди заступник нам, и утешитель, * и Церкви наша покровитель дивный, * да вси со умилением зовем ти: * радуйся, отче наш Германе, Аляски и всея Америки преславный чудотворче. [Дважды]

Слава, и ныне, Богородичен, глас 3:

Тя ходатайствовавшую спасение рода нашего, * воспеваем, Богородице Дево: * плотию бо от Тебе восприятою Сын Твой и Бог наш, * Крестом восприим страсть, * избави нас от тли, яко Человеколюбец.

По 1-м стихословии седален, глас 4.

Подобен: Удивися Иосиф:

Удивихомся вси подвигу твоему преславному, * како, с бесы брався, победил еси, * и како, со Ангелы беседовав, пользовался еси, * и како грубых людей ко Христу привел еси, Германе преподобне. * Богу помогающему вся содеяв, на Небесную жизнь беспрепятственно прешел еси, * идеже ныне лицом к лицу безвестная и тайная Божия зриши и о нас молишися.

Слава, и ныне, Богородичен:

Удивися Иосиф, еже паче естества зря и внимаше мыслию, * иже на руно дождь, в безсеменном зачатии Твоем, Богородице, * купину, огнем неопалимую, жезл Ларонов прозябший, * и, свидетельствуя, обручник Твой и хранитель, священником зываше: * Дева раждает и по рождестве паки Девою пребывает.

По 2-м стихословии седален, глас 4.

Подобен: Скоро предвари:

Еже от Бога звание прием, * оставил еси отца и мать, богатство и дом * и, по стопам Господа твоего шествовав, на место подвигов твоих достиг еси, * идеже плоть изнунив воздержанием и людей алеутских привел ко Христу, * ныне прославляеши от Бога в Церкви Его, яко преподобный апостол Христов.

Слава, и ныне, Богородичен:

Поем Тя, Богоневесто, Мати Христа Бога, * славяще Рождество Твое непостижимое, * Имже избавихомся от лести диаволи и всяких бед, Богородице Владычице, и верно вопием: * помилуй стадо Твое, едина Всепетая.

По полиелеи седален, глас 8.

Подобен: Премудрости:

Премудростию Божественною напоив твою душу от Первоисточника, Спаса нашего, * был еси источник воды, текуция в живот вечный, якоже глаголет Господь. * Тем и напоил еси жаждущих слова Божия простых и ученых, * и никтоже можаше противустати глаголом твоим Богодухновенным. * Сего ради вси почитаем преподобнаго апостола и согласно вопием: * моли Христа Бога согрешений оставление даровати * чтущим любовию святую память твою.

Слава, и ныне, Богородичен:

В напасти многоплетенныя впад от враг видимых и невидимых, * бурею одержим безчисленных согрешений моих, * и яко к теплomu заступлению и покрову моему, Чистая, * ко пристанищу притекаю Твоя благости. * Темже, Пречистая, из Тебе воплощенному безсеменно молися прилежно о всех рабех Твоих, * непрестанно молящих Ти ся, Богородице Пречистая, * молящи его присно согрешений оставление даровати * воспевающим достойно славу Твою.

Таже степенна, 1-й антифон 4-го гласа.

Прокимен, глас 4: Честна пред Господем * смерть преподобных Его.

Стих: Что воздам Господеви о всех, * яже воздаде ми.

Всякое дыхание:

Евангелие от Матфея, зачало 43.

Рече Господь Своим учеником: вся Мне предана суть Отцем Моим, и никтоже знает Сына, токмо Отец, ни Отца кто знает, токмо Сын, и емуже аще волит Сын открыти. Приидите ко Мне вси труждающиеся и обремененнии, и Аз упокою вы. Возмите иго Мое на себе, и научитесь от Мене, яко кроток есмь и смирен сердцем, и обряцете покой душам вашим. Иго бо Мое благо, и бремя Мое легко есть.

По 50-м псалме стихира, глас 6:

Преподобне отче Германе, * во всю землю Алеутскую изыде вещание исправлений твоих, * тем на Небесех обрел еси мзду трудов твоих, * демонския погубил еси полки, * и людей твоих исхитил еси от сетей их, * и ангельския достиг еси чины, * ихже житию без порока поревновал еси. * Дерзновение же имея ко Христу Богу, * мир испроси душам нашим.

Канон преподобнаго, глас 4. Егоже краегранесие: Германа, России и Америки похвалу, пою. [Парфений].

Песнь 1

Ирмос: Моря чермную пучину * невлажными стопами * древний пешествовав Израиль, * крестообразныма Моисеовыма рукама * Амаликову силу в пустыни победил есть.

Господь тя избра, якоже Моисея иногда, в вождя веры алеутом, яко да, извед я из тьмы фараонитския, введеш во свет спасительный вопиющих: Господеви поим, славно бо прославися.

Египет идолослужения восплакася горце лишением народа избраннаго, иже тобою проидоша сквозе море Крещения в землю обетования Христова, вопиюще: Господеви поим, славно бо прославися.

Радовахуся Ангели о спасении чад твоих духовных, Германе преподобне, якоже Господь рече, Иже и прият я в лоно Церкви Православныя, воспевающих: Господеви поим, славно бо прославися.

Богородичен: Мати Божия Благословенная, сохраняй ны, неопятенных в белой одежде Крещения и покаяния, воспевающих: Господеви поим, славно бо прославися.

Песнь 3

Ирмос: Веселится о Тебе Церковь Твоя, Христе, зовущи: * Ты моя крепость, Господи, * и прибежище, и утверждение.

Алеутов просветив, спасл еси от неприязни врага, ни богатством, ни силою приобретая их, но премудростию Духа, и подвигом преподобия, и проповедию благочестия, яко несть свят, якоже Бог наш, и несть праведен, паче Господа.

Не мудростию хвалился еси, но мудростию всех учил еси благочестию, любити Христа, и веровати в Него, и греха боятися, глаголя: несть свят, якоже Бог наш, и несть праведен, паче Господа.

Аще и в трудах и в страданиях подвиг твой совершил еси, но радости исполнен был еси, на сие бо едино токмо зря, яко Божие дело твориши, и яко несть свят, якоже Бог наш, и несть праведен, паче Господа.

Богородичен: Родивши без семени мужняго от Троицы Единого, Богородице Пречистая, дерзновение имаши богато помогати всем в подвиге и страдании пребывающим и исповедающим: несть свят, якоже Бог наш, и несть праведен, паче Господа.

Ин кондак, глас 8.

Валаама пострижник, * честный возлюбленный Божией Матери бывый, * ревнитель подвигов древних подвижников новый, * молитву, яко копие и щит, приемый, * страшен демоном и тьме язычестей ставый, * Германе преподобне, моли Христа Бога спасти души наша.

Седален, глас 4.

Подобен: Вознесыйся на Крест:

Вознесен быв Христом в звание апостола * и исполнив делом звание сие, * радость имел еси со дерзновением рещи Господу: * се аз и дети, яже ми дал еси жребий мой! * И, прием тя во обители апостолов, * венцем ты украси милости Своея, * и тобою дарует благодать всем, творящим любовию честную память твою.

Слава, и ныне, Богородичен:

Вознесену паче всех чинов ангельских, вемы Тя Ходатаицу пред Богом о нас, Богородице. * Темже, припадающе пред образом Твоим честным, молим Тя: * не отстави от нас милости Твоея, * но всегда покрывай от всякаго нахождения вражия * и путеводи ны ко пристанищу небурному жизни благочестивыя и спасения душам.

Песнь 4

Ирмос: Христос моя сила, * Бог и Господь, * честная Церковь * боголепно поет, зывающи, * от смысла чиста о Господе празднующи.

Овцы твоя из родов волчих воспитава, стаду Христову сопричислил еси и, доброму Пастырю Христу я вручив, мирною душею зывал еси: слава силе Твоей, Господи.

Спасову добродетель, покрывшую Небеса, проповедал еси во вся дни живота твоего и хвалы Его исполнил еси всю землю Алеутскую, Помощнику Богу зывая: слава силе Твоей, Господи.

Силою Бога твоего вся сотворив дивная и ужасная в животе твоём, не вознеслся еси мыслию, паче же смиряся, зывал еси выну: слава силе Твоей, Господи.

Богородичен: Имуща Тя, Мати Бога нашего, Ходатаицу за нас пред Судом Сына Твоего Божественного, любви и надежды исполнены есмы, зываша: слава силе Твоей, Господи.

Песнь 5

Ирмос: Божиим светом Твоим, Блаже, * утренюющих Ти души любовью озари, молюся, * Тя ведети, Слове Божий, * истинного Бога, * от мрака греховнаго зывающа.

Именем Господним моляся непрестанно, нищету в богатство вменил еси и, духом богатея, якоже Павел, глагола еси: ничтоже имея, вся содержу души человеческия в Господе.

Иже ты в алеуты посла, Той ты и утешаша на всяк день поспешеством Своим, дондеже всех приобрел еси Христу и душу твою спасл еси в Господе.

Аще и един изшел еси на врага лукаваго, якоже Давид на Голиафа, но силою Креста низложил еси его падением великим и людей избавил еси в Господе.

Богородичен: Можеша спасти от обстояний вражиих, Богородице, ихже хочещи, дана бо Ти есть благодать от Сына Твоего, в нихже и нас помяни, Чистая.

Песнь 6

Ирмос: Житейское море, * воздвигаемое зря напастей бурей, * к тихому пристанищу Твоему притек, вопию Ти: * возведи от тли живот мой, Многомилостиве.

Еже любити Бога нещевал еси первое коемуждо от христиан, и другим проповедал еси, и сам к сему всеми силами подвизался еси.

Рукою крепкою начав дело апостольства твоего, до конца неотступно совершил еси е, дондеже всех ко Христу привел еси и венца от Христа сподобился еси.

Истину Христову глубиною души восприим, раб был еси неключим Господа твоего, вся бо повеленная исполнив, меньше всех себе смирением нещевал еси.

Богородичен: Какое не дивимся Богомужному рождеству Твоему, Пречистая? Яко бо Мати безмужно низвела еси на землю Спаса нашего Иисуса Христа, в Немже спасаемся и жизнь наследуем.

Кондак, глас 8.

Подобен: Взбранной Воеводе:

Взбранному Воеводе своинствовався, * в брань вступил еси на духа злобы в поле преподобия и апостольства. * И, пожав победы обоюдныя, * воздвизаеша нас вопити тебе: * радуйся, святе Германе, апостоле преподобный.

Икос: Нещь наша брань противу крови и плоти, но к духовом злобы поднебесным, якоже рече апостол. Сего ради облек на ся всеоружие Божие в Валааме и, обувся добре в благовествование Православия, отшел еси в Америку, яко всеоружник Божий победительный. И подвигом добрым подвизався, веру Православную насадив и течение земнаго пути скончав, венец славы восприял еси от Бога по достоинию и нас воздвизаеша вопити тебе: радуйся, святе Германе, апостоле преподобный.

Песнь 7

Ирмос: Росодательну убо пещь * содела Ангел * преподобным отроком, * халдеи же опаляющее * веление Божие мучителя увеща вопити: * благословен еси, Боже отец наших.

Из России изшед благочестивыя и в Америку достиг, совершил еси дело апостольства и преподобия, отгуду же в вечное отшед отечество, поеши Господеви: благословен еси, Боже отец наших.

Постом и молитвою влагу страстную плоти изсушив, дух возвысил еси в меру возраста Христова, во еже всем естеством пети возможши: благословен еси, Боже отец наших.

Опасно проходя путь добродетели и не уклоняся ни одесную, ни ошуюю, людей твоих водил еси безпорочно к Богу, и сам достиг еси Царство, идеже поеши: благословен еси, Боже отец наших.

Богородичен: Христа Еммануила Мати Благословенная, предстательствы Твоими всели Дух Сына Твоего в сердца наша, яко да с нами Бога имуще, злых свободимся и пети выну возможем: благословен еси, Боже отец наших.

Песнь 8

Ирмос: Из пламене преподобным росу источил еси * и праведнаго жертву водою попалил еси: * вся бо твориши, Христе, токмо еже хотети. * Тя превозносим во вся веки.

Вод, за любовь твою возлюбив тя и не единого дне не стерпев смертнаго лишения твоего, сам убися в печали своей по тебе, яко тварь сице воспевая Господеви.

Ангелы имел еси смолитвенники в тайне убогия келлии твоя, иже и известиша тя о дни и часе преставления твоего и прияша тя последи^и в лики святых воспевати во веки Господеви.

Людей твоих возлюбив паче всего на земли и вся благая им содеяв, Небесная прежде и земная, научил еси я доброму благочестию, во еже вкупе с ними zde и тамо воспевати Господеви.

Богородичен: Утробу Твою освяти Родивыйся от Тебе, Богомати, и ширшую Тя Небес сотвори благоутробием матерним, имже всех нас покрываеши от всяческих бед, Благодатная.

Песнь 9

Ирмос: Бога * человеком невозможно видети, * на Негоже не смеют чини Ангельстии взирати; * Тобою бо, Всечистая, явися человеком * Слово воплощено, * Егоже величающе, * с Небесными вои Тя ублажаем.

Призре на смирение твое Господь, Егоже душа твоя величаше и о Немже дух твой радовашеся вся дни живота твоего на земли, и вознесе тя в Царствии Своем, яко единого от избранных Своих.

Общаго Владыку зриши ныне лицом к лицу. Не забывай убо в молитвах твоих всех, почитающих память твою, но сохраняй от лютых бед и погибели вечныя.

Юность твоя благочестива, мужество твое праведно, старость твоя свята и во веки жизнь блаженна. Моли убо спастися нам.

Богородичен: Парфену Деву Тя вси ублажаем, праматернюю клятву разрушившую Рождеством Твоим и Адамово изгнание исправившую. Людей убо Твоих сохраняй змиинных искушений всемогущим предстательством Твоим и введи ны в блаженство рая.

Светилен, глас 3.

Подобен: Свете неизменный:

Свет Божественный возсиял еси алеутом потемненным * и претворил еси я из белых волков Севера в овчата кротка стада Христова. * Не престай убо и ныне моляся, Германе преподобне, * о наздании в Америце Православия.

Слава, и ныне, Богородичен:

Света не вечерняго нас причастники сотворила еси, Богородице, Божественным Рождеством Твоим, * Бога бо родивши Человека, * Крестом и смертию и Воскресением Его победители нас явила еси тьмы кромешныя * и наследники Царствия Небеснаго.

На хвалитех стихиры, глас 1.

Подобен: Небесных чинов:

Небеснии чини радовахуся, * зряще твой подвиг терпения неустрашимаго: * единаго бо твоих споспешник убиша непокоривии, * друзии же кораблем утопаше в мори, * остася ты един среди дивиих людей * и неустрашимо соверши до конца дело апостола.

Апостола Павла слыша, глаголюща, * яко ему послужисте руке его к пропитанию, * и ты землю копал еси, * волю любящу, помогающе тебе, * Германе преподобне, * и семена сеял еси, и плоды собирал еси, * имиже немощную плоть питати и нищую братию.

Господу глаголющу: * уразумеите истину, и истина свободит вы, * уразумел еси истину веры и любви к Богу, * и свободу от страстей приобрел еси, * и иных учил еси отроков же и старцев, * всех благочестно путеводя к свету Божественному и спасению.

Обременный леты и труды, * яко грозд в винограде и яко клас зрелый на ниве, * пожа тя Бог на покой и блаженство рая Небеснаго, * идеже предстоя во славе Престолу Всевышняго, * моли всем спастися, * чтущим любовию честную память твою.

Слава, глас 8:

Царю Небесный, всем дай на земли солнце и дождь во время свое * и о всех промышляяй милостию и щедротами, * исполнившуся времени послал еси преподобнаго Германа * из блаженнаго Валаама к алеутам непросвещенным, * иже просветити я светом Твоим Божественным. * И, дав ему благодать и крепость совершити дело Твое до конца, * приял еси его во обители апостол Твоих и преподобных, * украсив его венцем правды, * егоже воздаеши всем, возлюбльшим Тя * делателем винограда Твоего на земли. * Молитвами убо его даждь пребыти и преумножитися делу его * и душам спастися, почитающим святую память его.

И ныне, Богородичен:

Владычице, прими молитвы раб Твоих * и избави нас * от всякия нужды и печали.

Славословие великое и отпуст.

НА ЛИТУРГИИ

Блаженны от канона преподобнаго, песни 3-я и 6-я.

Алеутов просветив, спасл еси от неприязни врага, ни богатством, ни силою приобретаая их, но премудростию Духа, и подвигом преподобия, и проповеднио благочестия, яко несть свят, якоже Бог наш, и несть праведен, паче Господа.
[Дважды.]

Не мудростию хвалился еси, но мудростию всех учил еси благочестию, любити Христа, и веровати в Него, и греха боятися, глаголя: несть свят, якоже Бог наш, и несть праведен, паче Господа.

Аще и в трудах и в страданиях подвиг твой совершил еси, но радости исполнен был еси, на сие бо едино токмо зря, яко Божие дело твориши, и яко несть свят, якоже Бог наш, и несть праведен, паче Господа.

Еже любити Бога нещевал еси первое коемуждо от христиан, и другим проповедал еси, и сам к сему всеми силами подвизался еси.

Рукою крепкою начав дело апостольства твоего, до конца неотступно совершил еси е, дондеже всех ко Христу привел еси и венца от Христа сподобился еси.

Слава: Истину Христову глубиною души восприим, раб был еси неключим Господа твоего, вся бо повеленная исполнив, меньша всех себе смирением нещевал еси.

И ныне: Богородичен: Како не дивимся Богомужному рождеству Твоему, Пречистая? Яко бо Мати безмужно низвела еси на землю Спаса нашего Иисуса Христа, в Немже спасаемся и жизнь наследствуем.

Тропарь преподобнаго, глас 1:

Аозу Православия принесл еси в Америку из России благочестивыя * и, удобрив корень постническими трудами * и напоив обильне молитвенными слезами, * плоды принесл еси – виноград возлюбленный, * Германе преблаженне отче наш. * Темже и Бог тя прослави, яко апостола преподобнаго, * нетлением мощей и благодатию чудес, * от них же почерпающе благодаяния, восхваляем тя: * слава Давшему ти крепость, * слава Венчавшему тя, * слава Даровавшему тя Америке светило Православия.

Ин тропарь преподобнаго, глас 3:

Преподобне отче наш Германе, * первый светильниче, в земли нашей просиявый, * приносим вси тебе похвалы сия, * ты же, яко имеяй дерзновение ко Господу, * буди заступник нам, и утешитель, * и Церкви наша покровитель дивный, * да вси со умилением зовем ти: * радуйся, отче наш Германе, Аляски и вся Америки преславный чудотворче.

Кондак преподобнаго, глас 8.

Взбранному Воеводе своинствовався, * в брань вступил еси на духа злобы в поле преподобия и апостольства. * И, пожав победы обоюдныя, * воздвизаеши нас вопити тебе: * радуйся, святе Германе, апостоле преподобный.

Ин кондак преподобнаго, глас 8.

Валаама пострижник, * честный возлюбленный Божией Матери бывый, * ревнитель подвигов древних подвижников новый, * молитву, яко копие и щит, приемый, * страшен демоном и тьме язычестей ставый, * Германе преподобне, моли Христа Бога спасти души наша.

Прокимен, глас 7: Честна пред Господем * смерть преподобных Его.

Стих: Что воздам Господеву о всех, * яже воздаде ми.

Апостол к Галатам, зачало 213.

Братие, плод духовный есть любви, радость, мир, долготерпение, благодать, милосердие, вера, кротость, воздержание: на таковых несть закона. А иже Христовы суть, плоть распяша со страстьми и похотьми. Аще живем духом, духом и да ходим. Не бываем тщеславни, друг друга раздражающе, друг другу завидяще. Братие, аще и упадет человек в некое прегрешение, вы духовнии исправляйте такового духом кротости: блюдыи себе, да не и ты искушен будещи. Друг друга тяготы носите, и тако исполните закон Христов.

Аллилуия, глас 6: Блажен муж, бояйся Господа, * в заповедех Его восхощет зело.

Стих: Сильно на земли будет семя его.

Евангелие от Матфея, зачало 10.

Во время оно, по Иисусе идоша народи мнози от Галилеи и десяти град, и от Иерусалима и Иудей, и со онаго полу Иордана. Узрев же народы, възиде на гору, и седшу Ему, приступиша к Нему ученицы Его. И отверз уста Своя, учаще их, глаголя: блажени нищии духом, яко тех есть Царствие Небесное. Блажени плачуции, яко тии утешатся. Блажени кротцыи, яко тии наследят землю. Блажени алчуции и жаждущии правды, яко тии насытятся. Блажени милостивии, яко тии помиловани будут. Блажени честии сердцем, яко тии Бога узрят. Блажени миротворцы, яко тии сынове Божии нарекутся. Блажени изгнани правды ради, яко тех есть Царствие Небесное. Блажени есте, егда поносят вам, и ижденут, и рекут всяк зол глагол на вы яжуще, Мене ради. Радуйтеся и веселитесь, яко мзда ваша многа на небесех.

Причастен: В память вечную: